

Prudente versus malisan:

**Hatan ba institute Lao Hamotuk kona ba questao:
prudente ona ka Timor-Leste maneza nia orsamento?**

Hosi Rui Manuel Hanjam



(Hakerek ida ne'e hau ata hatun ba edisaun diario STL nian hanesan uja hau ata nia tempu lora 4 hodi hein Visa iha Jakarta atu ba tuir programa lideranca iha Estada Unidus Amerika. Hanoin nebe hau ata tau iha ne'e basea ba referencia barak nebe hau ata halibur durante ne'e atu fahe hanoin ba malu kona ba ita nia politika gestao orsamento nebe mai hosi fundu petrolifiro. Ida ne'e mos hanesan refleksaun ida atu responde ba Lao hamotuk nia prekupasaun nebe pesimista ba ita nia gestao mina nian

=====

Iha artikel nebe hatun hosi diario ida ne'e iha edisaun sabado, 17 de Janeiro 2009, pagina 8, opiniaun ho Titulo : **Prudente ona ka estada Timor-Leste maneza nia orsamento?** Hakerek nain hosi Instituto Lao hamotuk halo analiza ba oinsa stado Timor bele gere nia fundu minarai nebe sei sai sustentabel. Iha artikel ne'e hakerek nain mos prekupa teb-tebes tamba guverno prepara orsamento ba 2009 ho estimatisaun rendementu sustentabel tokon \$ 408 ho aumenta tan tokon \$ 181 nebe tuir hakerek nain nebe pesimista teb-tebes nebe expresa ho lia fuan balun hanesan hau atan sita tuir mai ne'e:

*...**"Politika gastu orsamentu 2009 sei iha gerasaun ida ka rua mai lori Timor-Leste ba iha "malisan Rekursu"..... ka iha lian engles dehan 'resource curse'.***

".....Lao hamotuk examina ona kria prekupasaun nebe seriu tebes katak orsamento estada 2009 sei dudu Timor-Leste tun ba iha kuak " malisan rekursu" ne'ebe akontese ona ba nasaun kiak sira....."

...**"homasu inserteza no diskonhesidu barak kona ba rendementu hosi fundu petrolio nebe sai hanesan erru seriu ida nebe sei homasu amiasa ba desevolvementu sustentabel iha tinan hirak oin mai....."**

...**"Tinan kotuk, rendementu mina sae aas liu fali duke visaun nebe espekta ona no guverno ne'e iha entusiasmu makas atu gasta osan sira ne'e ho lalais tebes...."**

Hare no le'e tiha artikel ne'e hau ata tenki fo louvor no apresiasaun ba hakerek nain hosi ekipa Rekursu Naturais no Ekonomia institute lao hamotuk nian tamba ho rasaun; **Premeiro**, tenki iha duni sociedade civil nia funsaun atu kontrola guverno nia knar ba halo execusaun orsamento nian tuir dalan lolos ba povu nia benefisiu. Tamba ho prekupasaun ekipa institute nian importante hanesan "watch dog" ka kontinua tau matan ba guverno no estado tomak nia gestao ba riku soin. **Segundo**, ho analize hirak hanesan ne'e, bele mos provoka discusaun constructive nomos halo riku liu tan ita nia hanoin kona ba ita nia rikusoin, no oinsa bele gere ho diak no koidadu (prudente) riku soin ne'e ba ita nia moris no ba future gerasaun, atu labele monu ba "malisan a'at" hanesan experiencia rai seluk nian.

Ho hau nia hakerek ida ida ne'e hakarak hato'o informasaun oituan atu nune'e ita bele to'o iha konklosaun katak ita tama ona ba malisan nebe refere ka lae.

Atu responde ba kestaun ida ne'e hau ata hakarak hato'o Pontus importante hanesan tuir mai ne'e:

- 1) Oinsa governo nia investimentu, cresementu no politica kona ba gestao orsamento?
- 2) Saida mak hanaran "resource curse" ka "malisan rekursus" ho halo komparasaun hosi pais balun;
- 3) Saida mak presiza ita halo atu la bele monu ba malisan nebe refere? Karik Timor iha ona kondisaun nebe inserteza no iha ona tendencia halai ona ba malisan a'at ne'e?

Investimentu fundu minarai , Cresementu ekonomia, Politika desenvolvimento sustentabel no equitabel

a) Investimentu Fundu Minarai no experiencia regional no internasional

Maluk le'e nain sira. Koalia kona ba investimentu hosi fundu minarai nian, ita fahe ba kategoria rua. *Premeiro*, investimentu hosi ita nia osan hodi sosa surat valor nebe hanaran "bonds" iha banku reserve Federal Estados Unidos nian iha Nova lorke. Iha parte ida ne'e Ministeriu das Financas fo delegasaun tomak ba ita nia Autoridade Bankaria Pagamentu (BPA) halao nia knar executa strategia investimentu ba fundu minarai nian no sempre hatama relatorio kona ba progresu investimentu kada trimestral no kada tinan. Iha tinan 2009 nia balancu hamotuk ho total tokon \$ 4,215. *Segundo*, Investimentu hosi governo nian atu uja orsamentu hosi fundu petrolifiro ne'e atu investe iha seitor importante hanesan iha infrastruktura, edukasaun, saude, agricultura atu nune'e dudu cresementu seitor non petrolifiro bele sai sustentabel. Kategoria eletricidade sai hanesan mega projetu nebe mak iha esperanca bo'ot nia retorno bele fila makas wainhira sistema estabesele ba selu kustu uja ahi nian. Iha area saude no edukasaun normalmente fo nia kontribuisaun indiretamente no longu praju ba cresimentu. Hanesan exemplu; karik ita investe deit ba edukasaun, nia retorno bele fila kleur no indireta maibe wainhira rekursus humanu iha ona fase formasaun kompleta maka outomatikamente kontribuisaun ne'e makas tebebes no sustentabel. Tamba ho matenek ema bele inventa sasan oi-oin, ho matenek ema nia produtividade bo'ot liu iha seitor hotu-hotu. Ita foti exemplu hanesan singapora laiha rekursus minarai hanesan timor no pais sira seluk, maibe ho industrializasaun no merkadu financeiro buras iha singapora, autoridade sira decide para investe makas iha edukasaun no capacitaun ba rekursus humanus. Tan nune'e ita sei la hakfodak, wainhira governo singapora tenki kunvida profesores famosu sira mai hosi Harvard, Oxford no seluk tan hosi Australia atu hanorin no estabesele no reforsa universidade sira iha Singapora hanesan Lee Kwan Yew school of Public policy no instituisaun seluk tan iha paize ida ne'e.

Orsamento transitorio 2007
nomos orsamento tinan civil 2008
barak mos aloka ba solidaridade,
defeza no seguranca maibe
Retornu nebe mak ita hetan
hanesan "estabilidade no paz" iha
rai laran no lori fila hikas refujiadu
ba sira nia fatin no resolve
petisionario sira nia casu nebe sai
hanesan factor determinante ba
actividade esemvolvimento hosi
seitor hirak seluk, wainhira povu
maris ho hakmatek no
dame....."custo politico" ba
recoperasaun nian karu tebebes
nebe presiza ita examina ita hotu
nia conciencia no halo
reflexao....atu la bele repete tan,
nune'e desenvolvimento bele lao
ho diak ba ema hotu nia maris
diak...."

Nune'e mos refere ba saude, karik saude bele reduz numero labarik mate, no fo atendentu saude diak ba ema hotu, atu ema la bele moras no nia produtividade bele sai diak liu tan. Ita nia povu sira la moras barak maka investimentu capital humanu inderetamente mos kontribui ba desevolvementu hanesan studu barak hatudu ona.

Wainhira governo AMP simu pose iha lora 8 fulan Agosto 2007, nebe iha situaun tensaun tamba crisi. Iha tempo ne'e keda Premeiro Ministro, Kayrala Xanana Gusmao ho koragen, konvida membro do governo hotu hodi diskuti kona ba saida mak prezisa atu halo hodi responde ba nesidade tomak hafoin crisi 2006 nebe akontese iha rai lora. Primeiro Ministro mos indika keda atu hare ba saida mak governo ne'e atu halo iha curtu praju no medium praju. Baseia ba diskusaun ne'e maka orsamento transitorio nebe hafoin lora ba debate ho klean, ikus mai decide iha tempo neba, ho montante tokon \$116,409 nebe mai hosi governo anterior, kuase aloka ba resolve deit problema refugiado, petisionario no mos veteranus nebe ita hotu hatene katak bele assigura siguranca no estabilidade nasional. Maibe montante nebe minim kuaze halo buat ladun barak.

Hafoin liu tiha periode ida ne' e, ita tama ba orsamento tinan civil 2008 ho montante tokon \$ 347,753 nebe hosi Estimasaun Rendementu Sustentabel (ESI) tokon \$ 294. Tama iha ratificativu aumenta tan sae ba tokon \$ 788,312 ho rendementu sustentabel hamotuk tokon \$ 396,1 . Montante ida ne'e compostu hosi tokon \$ 548, aumenta tan Fundu Estabilizasaun Ekonomia tokon \$240. Hafoin ikus mai Tribunal decide governo labele hatun ka uja tokon \$ 294 nebe liu ESI. Nune'e governo iha deit tokon \$ 498 nebe bele exekuta. Kbit governo ne'e nian bele executa iha "cash" ka osan mais ou menus tokon \$ 412. Governo mos aumenta tan exekusaun orsamentu mai hosi carry over hamotuk tokon \$69,5 nebe sai total hamotuk tokon \$ 481,5.

Orsamentu tinan civil 2008 nebe refere foka ba prioridade 6 hanesan; siguranca no estabilidade, protesau social, criasaun empregu no juventude, atendentu servisu iha base nomos governasaun nebe mos (clean governance).

Ita analise didiak, orsamento transitorio 2007 nomos orsamento tinan civil 2008 barak mos mak aloka ba solidaridade, defeza no seguranca, liu-liu ba seguranca hafoin tentative hasoru presidente da Republika no Premeiro Ministru iha lora 11 fulan Febreiru tinan kotuk . Retornu nebe mak ita hetan hanesan "estabilidade no paz" iha rai lora no lora fila hikas refujiadu ba sira nia fatin, resolve problema petisionario nebe sai hanesan factor determinante ba actividade desevolvementu hosi seitor hirak seluk. Waihira povu moris ho hakmatek no dame mak buat hotu bele halao ho diak. Tamba ne'e tuir hau ata nia hanoin katak "custo politico" iha recopersaun nian karu teb-tebes. Maske ita reconhese governo anterior hatur tiha fundasaun ida, maibe ho crisi politika halo naksobu hotu ita nia instituicao siguranca nebe tuir lolos "satan netik lutu ba ita nia povu. Ida ne'e sai hanesan kestaun ida ita atu bele halo reflexaun hodi nune'e ita hotu prezisa exame ita nia konsiencia atu labele repete crisi nebe liu ona iha future mai.

Iha hau ata nia participasaun iha eventu conferencia kona ba "Krisi Financeiro no Crisi Alimentar mundial ho nia impaktu ba labarik ho ema vulnerabel sira, nebe halo iha Singapura iha lora 6-7 fulan Janeiro 2009, paisas sanolu resin hat (14) iha Asia no pasifiko, paisas hirak ne'e precupa tebes atu buka halibur hanoin kona ba "formula no mecanismo" oinsa atu halo intervensaun hodi asigura moris labarik no grupo vulnerabel. Mekanismo ida maka hanesan paisas hotu-hotu tenki "reserve fundu especial" atu asigura programa protesau social. Indonesia hanesan hato'o hosi Ministra Financas, Dr. Sri Mulyani katak, sira halo tiha ona sala iha pasado

tamba duni deit cresimentu no abandona tiha distribuisaun rendementu ba hadian ema barak nia moris, tan nune'e ministra ne'e reforsa katak ba governo foun iha lideranca Presidente Susilo Bambang Yudhoyono hamosu no reforsa strategia duni kresimentu hanesan parte ida, iha parte seluk mos hakarak tau duni orsamentu significante no suficiente atu asigura programa protesaun social, nune'e nivel ema kiak hosi Indonesia nebe ho populasaun hamotuk tokon ±250, tun hosi tokon 27, tokon 15, agora hela deit tokon 8 tuir Ministra ne'e nia estimasaun.

Fundu Estabilizasaun Ekonomia nebe governo ne'e adopta sai hanesan mos modelu ka dalam alternativu ida maske nia mekanisme implementasaun bele dehan sidauk sistematiku tamba preparasaun nebe minimu, maibe nia intensaun no kontiudu atu proteze ema kiak sira hanesan subsidiu ba fos atu nune'e povu hetan fos ho folin baratu. Nune'e mos ba material construsaun nomos mina. Maibe pratikamente decizaun ne'e la bele implementa hotu no efektifamente ho rasaun laiha consensus" politika" nebe forti iha kontekstu politika ita nia rai laran. Ita mos bele comprende katak, ita sei iha nivel ida fragil no infancia in termos prosesu democracia iha ita nia rain. Sidauk iha separasaun kona ba saida mak "interese politika ka partidaria" no saida mak sai hanesan interese komum ka povu nian. Karik ita presiza mos aprende politika hosi paiseskandinavia sira, katak partidu politika hotu (oposisaun no ida nebe ukun) bele iha deferencia maibe wainhira koalitia kona ba interese povu tomak nian moris sira hotu sempre iha " consensus nasional " atu asegura povu nia moris liu hosi decizaun konjunta iha plenaria parlamento nian nebe sira hanaran storting. Maibe decizaun hanesan ne'e laiha "embel-embel" politika. Hanesan gerasaun foun hau ata senti prekupa tamba, dalam nebe lori sasan ba tribunal de rekursus "legalmente" los tamba preve iha ita nia constituisaun, maibe "moralmente" ita hotu sidauk iha konsiencia atu desevolva ita nia rain no hadian ita nia populasaun nia moris. Maibe it bele mos haburas dadaun cultura politika nebe la fo dalam ba desevolvementu atu lao ba oin. Ho nune'e karik aban bain rua oposisaun seluk sae fali, (karik AMP !) laiha ona "kompromi" atu separa saida mak interese nasional no saida mak lae, ho nune'e kontinua lori nafatin ba tribunal, karik la satisfoitu ka kontra orsamentu nebe propoin ba parlamentu.

Investimentu hosi seitor publica, nebe IV governo constitucional halao mos hetan kritikas makas hosi Fundu Monetariu Internasional no Banku Mundial nebe uluk kedas fo asistencia teknika no suporta ita nia prosesu. Maibe instituisaun rua ne'e mos hahu hare realidade katak krisis finaceira iha Amerika indika ona katak seitor privadu iha dadaun ona fase ida stagnadu (lao neneik la vilocidade) ka la lao ba oin, nebe presiza insintivu hosi seitor publiku atu asigura ekonomia. Instituisaun rua ne'e hahu hare katak, ema barak nebe uluk kritika modelu Keynes nian nebe konsidera la favorable ba cresimetu ekonomia, hahu implementa fali modelu ne'e tamba krisis finaceiro nebe afeta ekonomia mundial. Modelu Keynes nebe famosu iha tinan 1930 hateten katak: " iha ekonomia nebe seitor privadu la konsege ou sidauk lao ho diak ou lao ladiak tamba fator ruma iha nia impedimentu, presiza intervensaun hosi seitor publiku atu bele garante estimula cresimentu ekonomia....". Ita foti exemplu, Amerika nebe liu hosi Presidente foun Barak Obama anuncia paketa ba rekoperasaun instituisaun finaceira iha amerika ho montante tokon \$ 800, Ou iha parte seluk ita mos hare Lederansa Asean nian hamotuk ho Korea, China no Japao, iha Siang Mai mos anuncia paketa ida atu asigura orsamentu ba asaun preventiva hasoru krisis finaceira nebe mai hosi America, hahu daet ba Eropa, molok mai Asia. Faktu hatudun katak, Singapura kona ona nia impkatu, tamba ne'e ekonomia Singapura nebe depende makas ba mercadu finaceiro tun ba -2,88%.

b) Cresementu ekonomia

Iha kontekstu investimentu fundu petrolifiro, hakarak ka lakohi ita tenki halo duni investimentu ba seitor produtivu. Faktus hatudu katak se decizaun atu rai osan ne'e iha banku (saving) no oitooan deit mak tau ba investimentu nia contribuisaun ba cresimentu kikoan. Mai be waihira investe makas ba seitor nebe ho esperanca atu dudu seitor non petrolifiro buras, bele fo benefisiu ba future ne'e bele dudu cresimentu sai bo'ot. Foti exemplu hanesan Industria, agricultura no turismo. Ita bele foti esperencia hosi rai rua hanesan Ajerbaijan no Kazakhstan. Paizes rua nebe refere, iha objectivu nebe hanesana iha sira nia Politika ba Fundu Petrolifiru nian (le'e relatoriu Banku Asiatico hosi Norio Usui, ho titlu: How Effective are oil Funds..., 2007). **Premeiro**, Atu rai osan ne'e parte balu ba gerasaun foun; **Segundo**, atu asigura estabilidade ekonomia makro nebe mosu hosi volatilidade ka risku hosi rendimentu mai hosi mina rai nian nebe sempre tun sae.

Kazakhstan rai osan hamotuk 60% mai hosi nia exportacao mina 24,6 billoens. Ajerbaijan 12% deit hosi 12 billoens nebe rai ne'e hetan hosi exportacao mina. Maibe tamba Ajerbaijan accelera nia investimentu publika makas liu Kazakhstan nomos halo nia exportacao sae dala rua (doble)nia cricimentu ekonomia sae ba 30% nebe as liu iha mundu iha tinan 2006. Nia visinho Kazakhstan nia cresimentu sae deit ba 11% ba hodi dudu seitor laos mina (non oil sector).

Iha kontekstu Timor nian iha tinan 2007-2008, ita mos bele urgulho tamba hetan kresementu ekonomia nebe hatudu hosi ita nia Produitu Domestico Bruto (GDP real) nebe diak, respectivamente sae ba 8,4% no 10,5%, wainhira parseiro desevolvementu sira, inclui Fundu Monetariu Internasional mos pesimista ba governo nia eksekusaun orsamentu. Maibe iha parte seluk ita mos hakarak mantein nafatin estabilidade cresimentu ida ne'e ho haburas liu tan seitor non minarai nian seluk atu percentage nebe iha leten labele sai fiktivu deit. Ita bele hare grafiku 01 iha kraik nebe dada ho lina kotu-kotu reflata cresementu china no india nian nebe estabel, Maibe Timor nian negativu iha 1999 tamba violencia nebe akontese hafoin referendum, sae iha tinan 2000-2002 ho presensa funsionario agencia internacional sira, hafoin monu hikas fali ba zero (0) gradualmente ho mantein sae oitooan no monu hikas ba negativu fali iha tinan 2006 durante krisi.


Iha parte seluk mos ita bele esprika tamba sa mak cresimentu stagnadu iha tinan 2006 ba kotuk, ida ita bele hare dadus nebe bele esprika katak de faktu "sirkulasaun osan" nebe tuir los tenki injeta makas ba seitor produtivu iha ekonomia la akontese. Tese ida ne'e bele lori ita ba halo comparasaun oitooan katak execusaun orsamentu durante tinan lima nia laran hosi governo anterior hamotuk tokon \$ 497, montante ne'e inclui mos carry over hosi total nebe mak governo anterior simu hamotuk tokon \$ 713,8 ba tinan lima nian. Ne'e bele dehan katak tokon \$ 216,22 tama fali ba kofre de estado. Se karik ita foti valor klaran (average), execusaun menus hosi tokon \$ 100 ba kraik labele dudu cresimentu ekonomia.

Hau ata mos hakarak fo empaze makas ba korelasaun positive entre cresimentu ekonomia ho nivel ema kiak. Katak, krsimentu ekonomia paiz nian bele mos fo impaktu positivu ba hadian ema nia moris tamba hatun nivel ema kiak. Argumentu ida ne'e atu dehan ba ita katak, tuir expertu ka matenek nain sira nia hare, mais ou menus cresimentu 8% ba leten maka bele mantein nivel ema kiak sira atu labele aumenta ou tun. Menus hosi ida ne'e labele atu hatun ema kiak, pelo kontraui atu dudu nivel ema kiak sai bo'ot liu tan.

Faktus ida ne'e bele hatudu mos ho relatoriu Banku Mundial nian nebe servisu hamotuk ho Diracao Nasional Estatistika, nebe halao peskiza kona ba nivel ema kiak nian hosi tinan 2001 ho 2007 , iha neba hatudu katak nivel kiak iha tinan 2001 hamotuk 36% sae ba 49,9 % . Iha tinan 2001 se ita calcula populasaun hamotuk 800,000 signifika katak 36% hosi numeru ida ne'e hamotuk ema 288,000. Nune'e mos Iha tinan 2007 se ita foti 49,9 ho populasaun tokon 1 (1,000,000) ita mos hetan 499,000. Nune'e ema kiak aumenta tan 211,000. Kiak iha tinan 2001 fo kategoria ba sira nebe moris ho \$ 0,50 centimus, iha parte seluk kiak iha 2007 ba sira nebe moris ho \$ 0,88 centimus atu sosa aihan nebe iha kalaria 2100 gramas kada loron ida.

Tuir Fundu Monetariu internasional servisu hamotuk ho Ministerio das Financas nia analize grafiku hanesan hatudu iha grafiku 01.

Grafiku 01:



Fontes: IMF & Ministerio das Financas

Iha 2008 nia laran ita mos hare katak maske alokasaun orsamento sei bo'ot ba programa rekoperasaun social, ferik-katuas nomos grupo vulnerable sira, guverno mos halao tiha desevolvementu iha area infrastruktura no agricultura hodi muda sistema tradisional ba sistema mekanisasaun ka modernu hanesan uja trator ba fila rai hodi hasae tan produsaunagricula iha rai laran.

Orsamentu tinan 2009, ho montante tokon 660,873 nebe mai hosi fundu minarai, nomos previsaun rendemento non petrolifiro hamotuk tokon \$ 407,8, foti aumenta ho justifikasaun tokon \$ 181,2 inclui restu mai hosi reorsamentu, nia alokasaun hanesan ita hotu hatene katak ba seitor cavi ka prioridade nebe mentiona tiha ona iha leten.

Capital desenvolvimento ba tinan civil 2009 hamotuk tokon \$205, 334. (30%) Iha montante ida ne'e inclui mos investimentu ba projetu eletricidade nebe sei conclui iha tinan 2010 nebe sei kobre distritu no subdistritu tomak. Ne'e hatudu katak tinan 2009 hanesan tinan ba hahu infraestrutura base iha nasaun ida ne'e.

c) **Politika desenvolvimento sustentabel no equitabel**

Ho esplikasaun badak iha leten atu fo ilustrasaun deit katak politika desenvolvimento saida maka governo ida ne'e adopta? Karik ho politia equitabel ne'e maka ema barak hare dehan governo fahe osan arbiru deit?

IV Governo Konstitusional resforsa nia papel iha politika "**desenvolvimento sustentabel no equitabel**". Ne'e signifika katak governo hakarak halao politika desenvolvimento atu dudu "cresemento ekonomia" nebe sustentabel maibe lao pararelu ho protesasaun social nebe bele hadian ema nia moris no equilibra, no asigura distribuisaun rendemento ba ema kiak atu moris ho saudavel. Iha parte ida ne'e it bele hare katak desenvolvimento seitor real lao dadaun hanesan ita hare hadian estradas, irigasaun, ba oin eletricidade sei hahu dadaun iha tinan 2009, paralelu ho governo nia politika atu fo protesasaun social hanesan fo subsidu ba ferik no katuas sira ho invalid sira hamotuk 70,000, veteranus/ antigos combatentes sira hamotuk 200, cria mos programa cash for work atu loke oportunidade ba joven (feto ho mane) sira atu hetan netik osan atu hatutan sira nia moris maske iha curtu praju deit ho numeru hamotuk $\pm 35,000$ (Ia inclui implementasaun projetu eletricidade).

Koalia kona ba desenvolvimento sustentabel ita mos bele hare parte rendementu non petrolifiru nebe iha medium no longu praju sei fo contribuisaun. Reforma Tributaria iha future bele sai hanesan sasukat atu bele hasae cresimentu. Ita hatun taxa ho hanoin katak bele Atrai dadaun investimentu tama mai ita nia rai laran. Maibe ida ne'e ita bele dehan hanesan esforsa ida nebe it abele hare iha medium no longu praju nian. Maske hau ata pesoalmente hanesan intellectual, tuir teoria no esperiencia nebe hau aprende mos ladun konkorda ba kurtu no mediu praju, ba longu praju, rasionalmente bele aseita no justifika ho esperiencia rai balun hanesan singapora no seluk tan. Reforma Tributaria mos hare liu ba kondisaun moris ita nia povu nian, no ita nia bisnis iha rai laran nebe la favorable laiha mudanca atu dudu seitor privadu avanca ba oin, mak decizaun hanesan ne'e mos bele foti tuir parecer nebe matenek nain sira fo no governo ne'e akumula no implementa Dr. Ramos Horta nia hanoin.

Ba tinan 2009, ita iha previsaun ba Reseitas laos minarai (non petrolifiros) tokon \$ 91 nebe mai hosi fatin rua (2) hanesan impostus ho montante tokon \$84,2 no receitas proprias hosi orgao autonomas ho montante tokon \$ 6,9. Hosi imposto nian respectivamente hanesan impostos direitus, 11,1; impostos indireitus, 38,2; Receitas seluk no taxa, 31,5; no Jurus conta tesoru nian hamotuk 3,5. Tuir hau ata nia hare katak iha kurtu praju montante hosi receitas sei iha nivel ida kikoan maibe ida ne'e sei aumenta tan waihira investidor sira tama mai investe iha ita nia rai laran.

Ita mos rekonhese katak buat balu governo nebe hau ata halo parte ba halo ona, iha mos buat balu maka sidauk halo. Hanesan frakeza ita nian hotu. Ita foti exemplu hanesan; Seitor Turismo no industria kikoan nebe mak normalmente fortelese ekonomia, no laiha impaktu makas waihira iha crisi financeira mundial nian. To'o agora ita sidauk iha exforsa maximu atu promove ita nia seitor turismo no industria. Atu nune'e contribuisaun ba receitas domesticas non petrolifiro mos bele mai hosi seitor ida ne'e. Nomos seitor industria nian, iha visita barak nebe tama iha lista Trade Invest Timor-Leste nian nian maibe seidauk realize to'o agora. Karik iha fator

balu hanesan ita nia lei no siguranca mak seidak konvense investidoir sira maibe iha lideranca Primeiro Ministro nian it abele garante katak buat hirak ne'e ita bele hadian no hakat dadaun ba oin

d) Experiencia gestao mina Prudente versus "malisan rekursus"

Paizes barak nebe nia dependencia ba mina bo'ot, presiza iha lei fundu petrolifiro atu bele protégé nia strategia uja osan mina nian ho diak no prudente. Norwegia hanesan exemplu diak ba ita nia referencia. Iha Timor nian modelu ita adopta modelu Norwegia nian no halo ajustamentu ba modelu Kwait no Qatar nian hodi hamosu Conselho Nasional Petrolifiro nebe nia iha funcao atu fo conselho ba Parlamentu, liu-liu Comisaun C asuntu Ekonomia, Financas no anti-korupsaun hanesan modelu ida progresivu tebes. Tan nune'e mak ita hodi hanaran "Norwegian Plus". Iha hau ata nia visita hamotuk ho Conselho Fundu Petroleum ba iha Norwegia hau ata sei lembra lia fuan nebe matenek nain sira, no membro parlamentu Norwegia nian hato'o katak " Imi bele adopta modelu saida deit mak diak liu iha mundu maibe quando imi laiha diciplina fiscal, karik loron ruma modelu ne'e failha labele fo sala ba modelu ne'e maibe fo sala ba imi nia decizaun no strategia ba investimentu..".

Buat hirak ne'e iha rasaun hotu, maibe ho prosesu desevolvementu iha Timor hatudu katak tamba ita Desemvolve hosi base no presiza orsamentu makas ba investimentu tamba distrusaun nebe mak ita hetan. Karik ita nia fundu petrolifiro diak maibe presiza hadian diak liu tan atu bele asigura ita nia desevolvementu.

Iha paisis nebe maka halao sira nia desevolvementu baseia ba rendementu mai hosi mina, Ita bele foti exemplu hosi paizes mediterania hanesan Kwait, Saude Arabia, Iran, Irak, Qatar no seluk tan. Paisis iha Eropa hanesan Olanda, Norwegia, Norte Amerika hanesan Canada, Alaska, Amerika latina hanesan Venesuela, Brasil; Asia hanesan Indonesia, Bangladesh, Vietnam, Eropa Leste hanesan iha Ajerbaizan Kajakstan no seluk tan. Maibe hosi paizes nebe hau ata temi, tuir analise hosi matenek nain rua, John V. Michell ho Paul Stevans iha sira nia relatorio ho titlu: **Ending dependence, hard choices for oil exporting states** hato'o katak paisis sira ne'e bele sai ona hosi dependencia ba mina tamba seitor sira seluk desevolvidu ona atu bele asigura desevolvementu karik loron ruma "mina maran" ona ka "nia folin" tun ba presu nebe kik liu. Maibe hosi paisis nebe hau ata temi mak hanesan Malaysia, Indonesia ho Norwegia, enkuanto paisis sira iha regioa mediterania hanesan Kwait, Saudi Arabia seidak konsege muda sira nia dependencia ba Mina at uses a'an ba seitor sutentabel hanesan non petrolifiro nebe hau ata refere. Maibe ita presiza tau iha konta katak, kada paisis hahu nia prosesu la hanesan iha kontekstu desevolvementu. Ita foti exemplu, Norwegia hahu reforsa tiha nia seitor laos mina (non-oil) hanesan rekursus ikan iha tasi, seitor agricultura no industria mobiliarius iha tinan uluk liu ba kotuk, molok paiz ne'e hetan mina iha tasi laran iha tinan hitu nolu resin (1970-75). Paise ne'e mos fahe teritoriu ho Islandia, Canada iha parte norte no Englatera iha parte sul, diskuti no resolve tiha nia fronteira ho paisis hirak nebe refere molok atu halo explorasaun. Iha kontekstu ida ne'e la hanesan ho Timor nebe tamba deit presiza osan lalais ita tenki koalia deit kona ba eksplorasau iha Area Desevolvementu petrolifiro Conjunta ka (Joint Petroleum Development Area (JPDA) duke asigura ita nia fronteira maritime nebe komposto hosi Zona Ekonomia eksklusivu no Zona continental Teritoriu. Ho experiencia hanesan ne'e Norwegia bele dehan la presiza depende makas ba fundu minarai mos, paise ne'e bele sustentabel hela. Maske nune'e atu asigura orsamentu tuir fundu petroliu norwegia nian obrigatoriumente, governo tenki foti 4% hosi rendementu real la enclui calculasaun riku soin nebe sei iha tasi laran hanesan Timor nia estimasaun. Atu fo hanoin mos katak, fundu Norwegia nian

estebelese ba entensaun atu tulun gerasaun future, maibe tamba cresimentu populasaun hosi paise ne'e laiha mudansa ida signifikante, mantein tokon 4,5 nune'e fundu ne'e parlamento Norwegia nian hanaran foun, muda hosi "Norwegian petroleum fund" ba Norwegian Pension Fund" nebe ho intensaun atu selu funcionario publico karik iha futuru sira sai pensionista iha sira nian rai.

Tabela 01, fo mai ita ilustrasaun ida kona ba oinsa ita sura ita nia Rendementu Sustentabel Estimativa ba 2009. Estimasaun ne'e nia formula hanesan hatudu mos iha "anexo I" Lei Fundu Petrolifiro nian. Ita hahu hosi Balansu tokon \$ 4,215 nebe mai hosi ita nia mina, tau tan rendementu future nebe calcula ho metode valores agora nian ka Net Present Value iha lian englesh, hafoin ita multiplika ho 3%, nebe ho resultadu ikus tokon \$ 407,8. Iha kasu Norwegia nian, hanesan exemplu ita kalkula 4% multiplika diretamente deit ho tokon 4,215 (4 billaun) la inclui valores futuru nian hanesan temi iha leten, ita hetan deit tokon \$168.6 nebe ki'ik liu wainhira kompara ho ita nian montate tokon \$ 407.8. Maibe komparasaun ne'e hanesan ilustrasaun ida deit tamba iha realidade fundu minarai Norwegia nian sae too tiha ona krone 2,120 billaun ou equivalente ho 364 billaun. Nune'e tinan ne'e foti 4% hosi 364 billaun.

Tabela 01:

Petroleum Fund balance	4,215
+ Net Present Value of future revenues	9,379
Total Petroleum Wealth (PW)	13,595
Estimated Sustainable Income (PWx3%)	407.8

Fontes: Ministerio das Financas

Kestaun nebe maka sai hanesan ita hotu nia prekupasaun maka oinsa ita bele uja seitor mina ne'e atu desevolva seitor laos mina (non-oil) atu bele asigura ita nia ekonomia ba future. Kestaun ne'e maka hau ata hanoin katak ita hahu dadaun prosesu balu, maibe hau ata la konkorda absoluta mente ho conclusaun hosi ekipa Lao hamotuk nian katak gerasaun rua ka tolu mai it abele tama ona iha malisan rekursus. Ita keta haluhan katak, ita haruka estudante ba fatin hotu-hotu, rekursu humanu sai ita nia prekupasaun bo'ot, desevolvementu ba infrastruktura ita hahu daudaun ona. Katak se iha tempu ida mai maka hatudu katak naturalmente ita nia mina hotu ona ka nia presu tun, ita sei justifika katak ita hetan ona ema nebe kualifikadu atu prence criteria ba asigura desevolvementu nebe sustentabel iha area seluk.

E) Mina ho nia Malisan Rekursus

Ita hotu hatene katak mina rai hanesan rekursu nebe labele halo foun fali (non renewable resource/energy). Mina mos tamba sai hanesan riku soin nebe dala barak mosu mos iha tasi laran (on shore) no raimaran (off shore) nebe bele dehan hanesan milagre hosi maromak ba ba paiz ida. Hanesan paizes barak nebe depende ba mina, ita foti exemplu sira nebe adere ba OPEC. Molok adere ba organizacao ida ne'e, paises hirak ne'e balu hetan difikuldade atu gere sira nia osan mai hosi mina. Liu-liu tamba hetan mina "devorla" deit nune'e gasta mos conforme "gostu" deit. It abele foti kazu Indonesia quando hetan "bonanza" mina iha tinan 1974-80 gasta la

tuir dalan. Tuir Profesor Mubiyarto katak Indonesia tama iha situasaun ida “ambivalente”, tamba osan ne’e Investe deit iha Jawa no la focus ba seitor produtivu, loke hotel bot, fatin halimar golf no seluk tan nebe kria disequilibrada iha prosesu desevolvemento no dikotomia entre area urbano no area rurais. Hau ata mos fo hanoin hikas ba Eropa nia kazu nebe hanaran “ Dutch Disease” . Tamba osan minarai barak, governo Holanda gasta osan arbiru no provoca inflasaun no valores osan olanda nian iha Mercado monu, nune’e afeta economia estagnadu. Iha mos kazu hanesan angola nian nebe osan mina nian (inclui diamante) fakar ba sosa kilat nebe mak la fo benefisiu ba povu maibe mantein deit poder ba bo’ot sira hodi funu hasoru malu. Malisan rekursus mos indika ba korupsaun nebe sai abut tamba osan mina nian nebe mai hanesan milagre ida nebe bele konforme ulun bot ka Decision maker sira nia hakarak.

F)Kontekstu Timor

Iha kontekstu Timor nian, Hau ata sidauk hare katak ita tama ona kategoria ida ne’e. Ita nia kontekstu desevolvementu diferente. Ita nia orsamentu mai hosu ajudu parceoro desevolvementu (Trust Fund) no gradualmente tama ho ita nia osan rasik hosi fundu petrolifiro, liu-liu ho negociasao no implementasaun Lei No. 9/2005 kona ba Fundu Petrolifiro.

Maske nune’e ita tenki prekupa nafatin kona ba korupsaun nebe maka hau ata rasik nebe halo parte ba AMP iha lideransa Primeiro Ministro Kairala Xanana Gusmao sidauk bele kombate ho diak tamba administrasaun nebe monta iha UNTAET nian tun mai Iha Primeiro to Terceiro Governo nian barak mak sei iha mentalidade mai hosi birokrasia Indonesia nian. Korupsaun iha Indonesia nia tempo sai sistematiku tiha ona. Indonesia agora daudaun foti dalan ida radikal atu kombate korupsaun iha sira nia rai laran, maibe sira mos rekonhese katak sira foin hetan buat kikoan sidauk hetan buat bot nebe mak bele dehan sai hanesan abut ba korupsaun.

Esforsu balu mak hanesan ita hotu hatene katak iha lideranca Primeiru Ministro nian governo atu forma Comisaun Ante Corupsaun atu hare ba kestaos ida ne’e. Governo mos estabelece tiha ona Comisaun Funcao Publico nebe nia knar mos hare ba acao disiplinar karik iha faktus no dadus ruma hasoru funcionariu publiku iha alegasaun korupsaun nebe iha. Nune’e mos ba Membro Governo sira enclui hau ata karik involve iha korupsaun presiza mos hetan acao ruma hosi Primeiro Ministro nebe iha competencia bo’ot ba ida ne’e.

G) Konklusau

*Hau ata konkorda ho Ekipa Lao hamotuk nia elaborasaun kona ba “politika prudente” ba gestao fundu petrolifiro nian maibe ho haraik a’an hau ata hoto’o katak hau ata hakarak reforsa hau nia argumentu kona hanoin nebe mosu katak ita atu besik monu ona ba “Malisan Rekursu” hanesan paizes sira seluk , ne’e analiza ida ke sedu liu karik, tamba ho rasaun katak: **Primeiro**, ita foin mak hahu gere ita nia Fundu Minarai iha fase inisial; **Segundo**, ita foin hahu investe, iha nebe investmentu ne’e sidauk fo resultadu nebe sustentabel ba medium praju no longu praju atu bele sai sasukat hodi foti conclusaun hanesan ne’e, maibe cresimentu ekonomia 8,4% ho 10,5% hanesan fase inisial se karik bele mantein to tinan 5 ba leten; **Terseiro**, IV Governo constitucional sei lao tuir hela regras nebe maka estabelese liu hosi ita nia fundu minarai, karik excede dala rua iha orsamentu ratifikatifu 2008, no tinan civil 2009, ita sei tuir hela justificacao nebe preve iha artigu 9, Lei do Fundu Petrolifiro no. 9/2005, alinea a, b, c,d; Quinto; Politika desevolvemento governo ne’e adopta sei sei prudente no balancu entre cresementu no ba protesau social nebe aban bain rua sei sai **desevolvementu sustentabel no equitable**.*